

四庫全書

史部

欽定四庫全書

史部

欽定八旗通志卷

一百三十六至  
一百三十七

欽定四庫全書

欽定八旗通志卷一百三十六

人物志十六

大臣傳二

滿洲鑲黃旗二  
古爾布什 鄂齊爾奈 納爾察 伊勒慎 覺羅色勒

阿哈尼堪 索海 哈什屯 武賴 阿喇善  
達素 巴山

納爾察

子瑚沙

納爾察姓鈕祜祿世居蘇克素護河之安圖

國初來歸授騎都尉世職隸滿洲鑲紅旗後改隸鑲

黃旗戊申歲從

太祖高皇帝征烏喇攻宜罕山城先登克之由叅領擢副都統列十六大臣後攻沙嶺不待大軍獨進歿於陣以長子佛索里襲騎都尉順治十二年

世祖章皇帝追念納爾察宣力行間著有勞績衝冒鋒鏑盡瘁捐軀

特賜謚端壯視一品大臣例立碑墓道次子瑚沙初任佐領

太宗文皇帝天聰六年從征明入大同與前鋒叅領圖魯  
什等偵敵遇敵四百人瑚沙彎弓躍馬馳入陣敵  
皆披靡略地至崞縣又擊敗敵衆崇德三年隨貝  
勒岳託征明同叅領熬拜先驅遇明騎兵三百突  
出搏戰以八騎擊卻之復率左翼前鋒兵過燕京  
畧山東明總兵黃某及太監高起潛率衆來拒瑚  
沙同佐領羅什等連戰皆捷追北數十里先是佛  
索里以不勝任革世職至是

命瑚沙襲父騎都尉職任前鋒叅領六年從征錦州轉戰松山杏山間屢有斬獲七年加一雲騎尉世職是年十月貝勒阿巴泰征明

上命瑚沙隨右翼大軍行俟入邊還報軍事十一月大軍入界嶺口屢敗敵瑚沙還奏明年春同前鋒統領努山等率兵九十赴界嶺口偵迎大軍俘獲敵卒無算順治元年四月隨睿親王多爾袞征流賊李自成率本旗前鋒敗賊將唐通於一片石追擊自

成至望都復與前鋒統領席特庫誘賊來戰夾擊  
破之六月同都統葉臣征山西至汾州同叅領道  
喇圖爾賽等破賊將白輝兵二年隨英親王阿濟  
格征陝西攻克綏德州及延安府有佐領哈爾漢  
俄班駐守南山為賊所襲戰沒瑚沙率數騎突入  
取屍以還會自成奔湖廣追勦至安陸府擊敗賊  
將邵章獲其船東至九江口與席特庫率前鋒二  
十人破賊營追敗之於九宮山復同叅領蘇拜希

爾根捕勦賊黨斬首二千餘級是年叙功晉世職三等輕車都尉三年隨肅親王蒙格征流賊張獻忠過漢中擊敗叛鎮賀珍兵獻忠自西充引衆迎戰瑚沙奮擊敗之五年敘功晉二等輕車都尉六年隨鄭親王濟爾哈朗征湖南時明桂王朱由榔據廣西其總督何騰蛟守湘潭我兵既克長沙渡江攻之前鋒兵薄城敵分三門出戰瑚沙與席特庫破其城西兵生擒騰蛟敵潰散遂下湘潭於是



衡州寶慶永州辰州諸郡縣皆以次攻克遇

恩詔晉爵為二等男九年九月擢鑲黃旗蒙古副都統奉  
命同學士蘇納海往朝鮮鞫獄十一年兼任工部侍郎明  
年擢奉旗蒙古都統列議政大臣十五年隨信郡  
王多尼征雲南十六年追勦明桂王朱由榔於永  
昌十七年凱旋以永昌初下時弗留兵守門聽軍  
士入城擾民降爵為三等男康熙三年卒

賜祭葬分世職為二以第五子瑚弼圖襲一等輕車都尉

次子碩伯海襲騎都尉

伊勒慎

伊勒慎姓費莫世居薩齊庫烏喇攻薩齊庫降其  
衆伊勒慎遂率所屬六部來歸後隸滿洲鑲黃旗  
兄曰古蘇

太祖高皇帝戊申年征烏喇

命古蘇招降斐悠城策穆特諸部烏喇惡之盡俘殺古蘇

妻子

太祖念其家以歸誠被害授伊勒慎騎都尉世職尋從征  
明有功加三等輕車都尉又以沙嶺戰功加二等  
輕車都尉天聰五年七月奉

命統兵鎮海州時明邊將窺伺瀋陽屢縱士卒入遼河採  
捕伊勒慎既之鎮密為防禦嚴偵緝設遊哨率所  
部駕輕舟追斬逋逃先後收獲人戶及舟艦器械  
無算七年九月敘功並以從征旅順口多斬馘加  
一等輕車都尉崇德元年四月晉三等男九月明

將造巨艦百餘橫截遼河為戰禦計伊勒慎與合  
守將烈列渾寨薩等沿河分立營寨別遣兵遷移  
近邊居民仍率將士設伏河口執其謀者以獻明  
兵望風引遁由此不敢犯四年十一月同刑部承  
政索海等征瓦爾喀部陣獲噶凌阿及餘黨二百  
餘人既而伊勒慎監守俘囚疎防脫逃烏喇博穆  
博果爾復糾衆來攻伊勒慎先衆敗走索海等擊  
破賊衆伊勒慎又不于汎地邀擊坐視博穆博果

爾及餘衆遁去論罪應死

詔革職鞭百籍其家六年十二月鑲紅旗大臣哈哈納劾  
伊勒慎防守海口時託言祭天則多魚苛斂兵丁  
財物及私造浮圖諸劣蹟勘實復論死仍奉

旨鞭百八年六月復鎮海州順治元年八月

命為牛莊城守官二年卒年七十有九子郎圖隨征薩哈  
連烏喇陣亡

卹贈騎都尉世職

古爾布什

古爾布什姓博爾濟吉特世居西喇木楞本蒙古喀爾喀台吉也

太祖高皇帝天命六年偕台吉莽果爾率所屬六百戶驅牲畜來歸俱授爵三等子隸滿洲鑲黃旗予古爾布什滿洲蒙古各三百人俾任佐領尚公主為額駙

賜青卓理克圖號天聰五年

太宗文皇帝親統師征明園大凌河城明監軍道張春以  
兵赴援古爾布什與額駙恩格德爾等禦戰弗力  
論罪應削爵

上念其自外藩歸順功免罪罰鞍馬一白金百兩尋擢兵  
部承政崇德元年隨征朝鮮明年朝鮮國王李倧  
降大軍征明皮島既凱旋以古爾布什於朝鮮王  
謁

上時亂班釋甲又私攜從役隨征論罰鍰繼以失察所管

佐領下俄齊爾桑罪狀論罰奪所轄丁壯三年更  
定官制改兵部右叅政有護軍洪科訐都統阿山  
之子塞赫隨征明昌平臨陣退避古爾布什奉

命勘訊不令塞赫訴辨詈洪科所訐定讞法司以古爾布  
什與洪科為姻親徇情偏袒議降秩

詔從寬罰鍰四年

上命理事官星鵠傳集蒙古官之舊隸喀爾喀察哈爾者  
星鵠悞傳八旗都統及諸王貝勒下護衛法司議



星魯罪並論古爾布什知蒙古官未集不即奏明  
宣召論罰如例六年隨征明錦州敗敵於寧遠明  
年再圍錦州敵兵犯我壕塹古爾布什擊走之後  
因失察護軍功罪論罰得

旨寬免

敏惠恭和元妃之喪輔國公扎喀納以歌舞軍中獲罪部  
議古爾布什以和碩額駙之親不行訶禁又不奏  
聞應削爵籍家產半

上復免之

世祖章帝順治元年古爾布什隨睿親王多爾袞入山海關擊敗流賊李自成明年敘功晉爵二等子七年九年兩遇

恩詔晉一等子世襲十八年正月卒年六十有五賜祭葬如典禮諡敏襄子色楞襲爵

鄂齊爾桑

鄂齊爾桑姓博爾濟吉特蒙古扎魯特部長巴克

之子也

太祖高皇帝天命六年巴克為我師所擒鄂齊爾桑來請  
為質釋其父還

上許之八年巴克來朝

上遣鄂齊爾桑與俱還

太宗文皇帝即位以扎魯特諸部背約附明

命大貝勒代善統師征之斬倡叛者擒巴克及其族拉什

希布等並以鄂齊爾桑至皆隸滿洲鑲黃旗

賜衣服器用有差授鄂齊爾桑為佐領尋從征董夔有斬獲天聰三年從

上征明過薊州步兵同額駙揚古利率先破敵五年圍大凌河城擊敗明錦州援兵八年敘功授三等輕車都尉世職是年八月從

上征明大同

上命前鋒統領圖魯什叅領吳拜分率左右軍而以額駙多爾濟與鄂齊爾桑並領中軍擊明總兵曹文詔

大敗其衆追至城下獲馬百崇德二年同都統都  
類叅領和託皆以出獵誤射他人馬繫兵部鄂齊  
爾桑先至與諸繫者共居一室叅政穆爾泰以時  
方溽暑令都類獨留室中徙衆於庭下以避之鄂  
齊爾桑亦徙出自設布帳以處穆爾泰復令撤去  
為和託更設鄂齊爾桑坐炎日中良久往告啟心  
郎穆成格穆成格不言理事官鄂穆克圖曰爾徒  
自怨乎抑欲陳奏乎如徒自怨則已果欲入奏我

等代陳之鄂齊爾桑曰縲紲之囚何敢復有陳奏  
耶事遂寢及鄂齊爾桑釋繫自奏

聞穆爾泰穆成格皆坐罷任鄂齊爾桑尋擢內大臣六年  
從征松山明兵夜犯

御營侍衛坤等擊卻之諸大臣未及禦敵者皆議罰  
上念鄂齊爾桑自外藩來歸著有勞績

特予免議順治二年正月子喇瑪思尚公主封固倫額駙

二月

世祖章皇帝以鄂齊爾桑素荷

太宗眷顧晉爵三等男五年卒子楚祿襲

覺羅色勒子額爾德

覺羅色勒滿洲鑲黃旗人祖禮敦追封武功郡王

景祖翼皇帝之長子也色勒初任佐領

太宗文皇帝御極

簡列十六大臣進八大臣任正藍旗都統天聰五年

上統大軍征明圍大凌河城令八旗分布八隅掘壕以困

之色勒率本旗兵駐城南明兵出犯色勒麾軍舍  
騎步戰敵敗北追至城壕乃還會我軍以礮擊毀  
城西南隅一臺據之列巨礮攻城城內兵突出圍  
台將引梯登色勒同都統和碩圖等合兵夾擊敵  
大潰竄入城我師掩擊抵城壕殲敵無算八年

上親統大軍征明宣府大同色勒奉

命隨貝勒德格類進獨石口敗敵長安嶺攻赤城克其郭

會大軍於應州九年正月



詔免功臣徭役色勒與焉六月以同都統宗室篇古等董

築城垣弗堅應罰鍰

上貫之十二月降鑲黃旗副都統崇德元年十二月

上親征朝鮮朝鮮國王李倬遣其妻子入江華島而已遁

入南漢山城豫親王多鐸等以兵圍城敵將率兵

五百來援色勒同叅領阿爾津擊敗之明年正月

進攻江華島敵列戰艦截海道飛夫雨集色勒率

右翼兵渡海衝越敵艦同佐領阿哈尼堪先衆至

奮躍登岸破其守島兵大軍繼進獲倭妻子倭被圍急又知妻子被俘遂降凱旋論功授騎都尉世職三年兼任吏部右叅政

世祖章皇帝順治元年擢內大臣仍任副都統四年錄武功郡王諸孫各予騎都尉世職色勒晉一等男遇恩詔晉二等子八年擢領侍衛內大臣十四年七月卒

賜祭葬如典禮謚勤愍立碑墓道子額爾德初任佐領崇德七年從大兵圍錦州擊敗明總督洪承疇松山

援兵八年隨貝勒阿巴泰征明明兵駐渾河岸進  
擊走之復敗明步騎數千於三河縣順治元年隨  
睿親王多爾袞擊流賊李自成追至望都敘功授  
騎都尉世職五年授叅領八年兼任戶部理事官  
九年遷本部侍郎遇

恩詔晉世職至二等輕車都尉十三年以員外郎朱世德  
司權河西務虧缺稅銀戶部誤援

恩詔免議並坐降黜額爾德降世職為騎都尉罷侍郎專

任叅領十五年擢鑲黃旗蒙古副都統後襲其父  
二等子爵康熙十年卒子喇祜塔襲

阿哈尼堪

阿哈尼堪姓富察世居葉赫天聰時曾祖椿布倫  
偕兄楚隆阿弟昂古里來歸隸滿洲鑲黃旗阿哈  
尼堪初任佐領同蒙古兩黃旗將領布哈塔布囊  
阿濟拜畧明寧遠明兵千人追至還擊敗之崇德  
二年從征朝鮮先右翼衆兵突過朝鮮戰艦遂取

江華島五年正月承政薩穆什喀索海征呼爾哈  
部阿哈尼堪同右翼兵助戰克雅克薩城時烏魯  
蘇屯之博果爾及烏喇合兵六千來襲正藍旗後  
隊右翼索海設伏擊之斬殺甚衆阿哈尼堪與焉  
又攻掛喇爾屯先入有功四月任禮部叅政敘功  
授騎都尉世職六年四月隨鄭親王濟爾哈朗征  
明圍錦州同左右翼兵合擊松山又與都統宗室  
拜音圖敗明總督洪承疇兵松山守將來夜來襲

我營其步兵復犯正黃旗蒙古汛阿哈尼堪並擊却之八月管鑲黃旗副都統事順治元年五月隨睿親王多爾袞入山海關擊敗流賊李自成八月世祖章皇帝以將遷都燕京分

命大臣統兵鎮守

盛京各城阿哈尼堪統左翼駐防

盛京十二月同都統阿山等率將士由蒲州濟河協征流寇二年正月晉三等輕車都尉二月奉

命率兵會豫親王多鐸南征平定河南江南皆著勞績攻揚州府時擊敗城內拒戰兵尋福山餘孽二千衆來犯阿哈尼堪率叅領達班代等連戰皆捷遂與都統馬喇希進攻常熟破之三年蘇尼特蒙古騰機思等叛聞豫親王率師進討先遁走阿哈尼堪同四旗將領勒兵追擊斬其黨百餘人俘獲無算以功晉一等輕車都尉四年擢兵部尚書六年八月鄭親王征湖廣阿哈尼堪同都統劉之源率兵

別趨寶慶聞賊渠王進才馬進忠據城乘夜馳往  
平明賊衆迎戰急擊殲之遂克寶慶時偽總兵馬  
有志等九營在南山坡阿哈尼堪乘勝進勦陣斬  
有志等七人又擊破賊渠袁宗第等十營于洪江  
大軍入沅州留阿哈尼堪駐守十二月賊渠王強  
等復犯沅州阿哈尼堪遣署護軍統領都爾德等  
破之于沅水斬偽副將三人及賊兵七百餘級七  
年正月師旋



賜白金三百兩三月調禮部尚書遇

恩詔加一雲騎尉並予世襲先是睿親王遣往迎朝鮮王弟阿哈尼堪啟巽親王滿達海等以叅領恩格德代之事覺下諸王大臣會勘論死得

旨革職罰贖留尚書任尋復原職遇

恩詔晉一等男八年十二月卒子噶爾哈圖襲別有傳

索海子多頗羅

索海滿洲鑲黃旗人姓瓜勒佳費英東第六子也

天聰五年七月初設六部官授刑部承政七年八月同兵部承政車爾格至錦州偵明邊隘斬獲有功

命管佐領事崇德三年二月明石城島總兵沈志祥挈所屬來歸索海隨貝勒杜度等運米濟之七月更定部院官制改授都察院左叅政統兵往大凌河兩岸十四屯堡畧地還復任刑部承政明年十一月同工部承政薩穆什喀往征索倫部索海統右翼

兵偵知掛喇爾屯有敵兵五百與理事官喀喀木  
等輕騎襲之奪其柵斬二百級擒百三十人及左  
翼薩穆什喀攻陷雅克薩城旋攻鐸陳城不下而  
還烏喇與兀魯蘇屯之博穆博果爾合兵六十襲  
其後索海率衆設伏衝擊之獲其輜重生擒四百  
人乘勝往攻博穆博果爾營馳馬直入敵衆大潰  
是役也先獲二千二百五十四人後自額蘇里屯  
以西額爾圖屯以東又獲男婦五千餘牛羊駝馬

無算凱旋

太宗親率諸王郊迎宴勞之叙功授二等輕車都尉世職  
部議索海出征索倫不堅立營寨嚴束士卒以致  
疎脫俘囚應罰贖追還賞賚

上以索海功罪相抵

特詔免之明年三月隨睿親王多爾袞等圍錦州坐阿附  
王貝勒私遣官兵歸家及離城遠駐罪論褫職籍  
沒復得

旨寬免仍輸罰贖六月王貝勒等統軍再圍錦州索海以  
兵四百截敵山城路還遇錦州出畋小凌河兵三百  
邀擊之斬九十餘級又從攻松山兵克之墮馬  
乘廝卒騎而歸會

敏惠恭和元妃喪索海坐召優人歌舞論罪免死削職分  
奴僕一半給其弟護軍統領圖賴且

諭曰爾既耽於逸樂任爾家居可也順治二年署副都統  
從征四川卒于軍子多頗羅

太宗文皇帝時授佐領順治元年以入關從破流賊功授  
騎都尉世職尋任都察院理事官九年八月加一  
等輕車都尉任蒙古副都統十四年十二月隨信  
郡王多尼進兵滇黔至雲南磨盤山爭先擊敵遂  
歿於陣

賜祭葬子多禪襲職

哈什屯

哈什屯滿洲鑲黃旗人姓富察先世居沙濟城祖

旺吉努當

太祖高皇帝時率族屬來歸授佐領既卒長子萬濟哈襲  
管佐領哈什屯為萬濟哈長子初任前鋒校隸正  
藍旗

太宗文皇帝天聰時改隸鑲黃旗授侍衛尋襲管佐領擢  
禮部叅政崇德二年同佐領喀愷等率兵分道征  
瓦爾喀俘獲甚衆三年

太宗親統師征喀爾喀留守

盛京禮親王代善聞明總兵沈志祥欲率石城島兵  
衆歸附遣哈什屯招之志祥遂來歸是年重定官  
制改哈什屯為禮部副理事官六年大軍圍明錦  
州明總督洪承疇率兵十三萬赴援據松山其總  
兵曹變蛟乘夜率衆犯

御營哈什屯先衆扞禦手腕中創仍裹創力戰卻敵得  
優賚白金及蒙古二戶

世祖章皇帝順治元年擢內大臣二年以勞績久著予騎



都尉世職嗣以考滿並遇

恩詔晉世職至一等輕車都尉加一雲騎尉七年五月列  
議政大臣七月睿親王多爾袞有疾哈什屯同議  
政貝子錫翰等往視睿親王曰予有疾

上宜臨視又曰爾等毋以予言奏請既而

駕幸視之睿親王罪大臣等違令擅請降世職為騎都尉  
八年

世祖親政鑒哈什屯無罪降職

命復之兩遇

恩詔晉爵一等男初冷僧機與哈什屯同為內大臣冷僧  
機諂附睿親王及睿親王卒冷僧機諛揚其功績  
因誣奏昔日兩黃旗大臣謀立肅親王豪格事

詔下法司鞠詢集哈什屯及議政大臣巴哈等質之盡得  
其阿諛誣陷罪狀肅親王之為睿親王所害也尚  
書鞏阿岱與都統和洛輝等議殺肅親王子富綬  
哈什屯言王無滅嗣之罪同巴哈立持不可事乃

已至是

世祖封富綬為顯親王和洛輝以黨附睿親王為議政大臣蘇克薩哈所劾磔死鞏阿岱與冷僧機朋比奸惡事覺

詔逮勘哈什屯亦質之鞏阿岱與冷僧機並伏誅時鄭芝龍隸正黃旗授子爵其子成功踞海島寇掠福建哈什屯奉

命同內大臣遏必隆鼇拜大學士范文程宣

諭芝龍導其招降成功芝龍因請改隸鑲黃旗遣人往福

建取其妻妾及幼子至京十年

詔以哈什屯宣力年久加一雲騎尉十二年

詔獎奉職恪勤諸大臣加太子太保十三年奉

敕使朝鮮鞫獄還奏稱

旨尋以年老致仕康熙二年卒年六十有六

賜祭葬如典禮謚恪僖子米思翰襲爵別有傳乾隆元年

孫大學士馬齊疏陳哈什屯勞績得

旨入祀賢良祠十三年

冊謚

孝賢皇后

推恩先世追封哈什屯一等公十四年曾孫大學士忠

勇公傅恒經畧金川功成凱旋

詔視勲臣額亦都佟國維之例

賜建宗祠春秋致祭以獎忠勲祀自哈什屯始

武賴

武賴滿洲鑲黃旗人姓瓜勒佳費英東第五弟  
吳爾漢子也天聰四年四月同叅領布爾堪等率  
精兵百人畧明邊境渡大凌河馳斬俘獲甚衆八年  
任佐領九年擢正藍旗都統崇德元年隨武英  
郡王阿濟格等征明值遵化三屯營守備率衆來  
窺盡殲之尋以不俟後隊先行出邊誑言王貝勒等  
逼脅先歸論罰如律奪其俘獲朝鮮之役隨豫親  
王多鐸擊敗其援兵復與都統譚泰率雲梯兵攻

城守陴者懾竄盡收其輜重牲畜以歸三年隨貝勒岳託征明至山東破明內監馮永盛總兵侯世祿等兵過董家口敵兵千餘沿山列陣同副都統準塔連戰皆大捷搗其營時我軍輜重既行明將率衆衝截復同準塔擊却其衆遂乘勝畧地克取二城先是武頓奉

命鞠蒙古訟事坐受賄徇私論罪褫職至是敘功授騎都尉世職五年隨睿親王多爾袞往明義州屯田刈

錦州田禾明兵爭拒武賴追擊至城濠而返遂進  
師松山敗其步兵八年隨貝勒阿巴泰征明至渾  
河明將率兵千餘迎戰同副都統訥爾特敗之師  
旋過密雲明兵列火礮以截歸路與都統鼇拜奮  
勇衝突明兵潰走大軍將出邊有敵兵來犯鑲藍  
旗武賴擊却之整軍以出復往畧地克取一城錄  
功加一雲騎尉順治元年入山海關從破流賊李  
自成兵進秩二等輕車都尉七年九年三遇



恩詔加至二等男子世襲尋以老乞休病卒年六十有四  
賜諡康毅勒石紀功子固德襲爵

阿喇善

阿喇善姓博爾濟吉特先世居扎魯特

太宗文皇帝時隨其祖喀喇巴拜來歸隸滿洲鑲黃旗尋  
授護軍叅領崇德二年列議政大臣四年

上征明錦州班師以阿喇善與叅領鼇拜等重修道路有  
泥濘不治者罰所乘馬入官六年隨睿親王多爾

衮圍明錦州王遣將士離營歸家阿喇善未奏

間論褫職籍家產半得

旨從寬罰鍰八年擢鑲黃旗滿洲副都統隨征明寧遠攻  
克前屯衛中後所二城

世祖章皇帝順治元年正月兼任刑部侍郎四月隨大軍  
入山海關擊敗流賊李自成追至望都二年隨英  
親王阿濟格西勸自成同叅領路什敗賊于綏德  
州進克延安府追賊至湖廣七戰皆捷是年敘入

關功授雲騎尉世職三年隨肅親王豪格征流賊  
張獻忠過陝西擊敗叛鎮賀珍於漢中偽副將武  
大定踞秦州之三寨山阿喇善同護軍統領哈寧  
阿等以兵六百由僻徑登山奪賊壘斬級無算進  
擊獻忠于西充大敗其衆獻忠既滅復分勦餘賊  
攻克遵義五年凱旋以在軍中時不勘決叅領希  
爾根爭功狀議罰

上賞之仍敘功晉世職二等輕車都尉六年隨英親王討

大同叛鎮姜瓖攻渾源州及左衛並復其城七年擢刑部尚書兼鑲黃旗蒙古都統尋追論克左衛時違英親王令不以登城將士名啟王及王詰問反巧飾罰鍰罷尚書任八年奉

命率兵征山東土賊至沂州攻圍蒼山賊寨斬賊首劉遜張齊及其黨百餘又搜勦附近山寨斬賊首王家臣王家盛張榮魏在斯等三百餘級俘獲甚衆是年敘征姜瓖功晉爵三等男嗣兩遇

恩詔晉一等男兼一雲騎尉九年四月兼任都察院左都御史尋隨敬謹親王尼堪征湖南為叅贊大臣擊賊衡州王歿於陣坐失援罪應褫革籍沒

命革世職仍留都統任十二年卒

賜祭葬如例

達素

達素滿洲鑲黃旗人姓章佳世居費雅郎阿由護軍授護軍校天聰五年從

太宗文皇帝征明圍大凌河城明監軍道張春率兵四萬  
由小凌河來援達素同護軍校鼇拜擊卻之旋往  
畧明地奪敵馬斬一人還尋擢護軍叅領崇德五  
年大軍圍錦州達素率護軍敗明杏山兵六年復  
圍錦州明兵數十人據塔山列火器拒守達素出  
不意率六騎馳上盡斬之復率兵邀擊松山遁走  
敵衆追至海岸溺死者無算七年隨豫親王多鐸  
征明寧遠擊敗敵騎八年同護軍統領阿爾津等

征虎爾哈部攻克博和理城又招降能吉爾屯及  
大噶爾達蘇屯

世祖章皇帝順治元年從大軍入山海關擊敗流賊李自成尋同都統巴哈納等征山西敗賊兵於太原攻克絳州追賊至黃河賊得舟遁達素督兵射之賊多墮水死二年隨英親王阿濟格勦自成于湖廣攻克安陸武昌追至富池口賊列營對岸達素先諸將衝擊俘獲無算三年隨肅親王豪格征流賊

張獻忠過漢中擊走叛鎮賀珍進師四川屢戰皆捷先是敘入闕功予世職騎都尉及獻忠滅加一雲騎尉六年隨英親王討大同叛鎮姜瓖敗賊於右衛已而賊大至達素奮前搏擊飛矢及其喉兩手足並中傷遂墮馬軍校欲負以退達素叱曰死則死耳何避賊為復裹創督衆力戰賊敗卻三遇恩詔並敘平姜瓖功晉世職至一等輕車都尉九年獻忠餘黨孫可望李定國等寇掠湖南廣西陷沅州武



岡寶慶及全州桂林達素隨敬謹親王尼堪征之  
敗賊衡州貝勒屯齊令率邏卒往寶慶偵賊踪跡  
還遇賊衆邀戰擊敗之尋率兵勦賊全州破賊三  
寨斬偽副將偽守道等九人及賊衆四千餘遣兵  
復興安灌陽斬賊將倪兆龍是年十一月敬謹親  
王擊賊衡州歿於陣將佐俱獲罪達素以調遣他  
往嗣復擊賊有功得免議十一年擢護軍統領十  
三年擢內大臣十六年海賊鄭成功陷鎮江犯江

寧

上命達素為安南將軍同都統索渾護軍統領賴塔等率  
師往勦至則賊已敗遁入海達素奏請進勦成功於  
厦門得

旨俞允遂領所部兵由浙江赴福建十八年

聖祖仁皇帝即位

命達素率兵還京仍任內大臣康熙八年領侍衛內大臣  
鼇拜獲罪達素舊為鼇拜引用坐黜罷尋仍復世

職及卒以其子達禧襲

巴山子舒恕

巴山滿洲鑲黃旗人姓瓜勒佳世居哈達祖巴岱  
國初率衆來歸授佐領再傳至巴山仍其任天聰五  
年從

太宗文皇帝征明圍大凌河城明兵出城誘戰副都統屯  
布祿戰歿巴山衝入敵陣得其屍以出復擊退敵  
兵取佐領郎格等二人屍歸明年大兵征察哈爾

其部衆有竄入明大同邊境者往索取之師旋明  
兵追襲巴山與承政圖爾格殿後設伏邀擊斬馘  
甚衆八年以克副任使授騎都尉世職尋任叅領  
崇德元年從

上征朝鮮同叅領屯泰等先衆破敵陣三年七月兼任工  
部理事官八月隨貝勒岳託征明自牆子嶺入邊  
薄燕京擊敗明太監馮永盛兵進攻鉅鹿縣率所  
部樹雲梯先登克其城敘功加一雲騎尉五年同

承政薩穆什喀索海等征呼爾哈部攻掛喇爾屯  
有斬獲七年奉

命隨奉國將軍巴布泰率師駐防錦州

世祖章皇帝順治元年睿親王多爾袞統大兵入山海關  
巴山率所部步戰擊敗流賊李自成尋擢工部侍郎  
郎敘功晉三等輕車都尉二年十一月授鎮守江  
寧副都統三年

命總管江寧駐防滿洲兵時江北山寨賊寇未靖江寧城

中奸徒謀為內應巴山訶得之捕斬逆黨三十人  
未幾偽潞安王朱誼石糾衆二萬餘分三路來犯  
巴山與副都統康喀賴等破走之賊復屯聚城北  
之攝山我軍進勦斬其渠數人餘黨悉潰竄四年  
明故官侯峒曾之子侯元瀨遣其黨謝堯文潛通  
明魯王朱以海於海島取偽勅及偽鎮黃斌卿致  
招撫大學士洪承疇書以歸為柘林遊擊陳可所  
獲有內仗承疇殺巴張二將語蓋指巴山與提督

張大猷也事

聞

上以逆書所云乃反間計

特宣諭慰承疇而

諭獎巴山張大猷曰爾等嚴察亂萌具見公忠盡職六年

江南總督馬國柱勦六安州山賊巴山以兵會之

陣斬賊渠張福震諸賊寨俱翦平兩遇

恩詔晉爵三等男九年還京十一年以久鎮江寧平賊寇

功晉二等男康熙十二年卒

賜祭葬如例以其子舒恕襲爵十五年舒恕隨大學士圖海征叛鎮王輔臣師次平涼城北虎山墩輔臣以衆萬餘拒敵敗之是年復隨都統穆占征逆藩吳三桂破賊衆三千於湖北松滋縣二十年進圍雲南城擊敗賊將胡國柄劉圯龍黃明等又感賊將馬寶已養元等於烏木山二十五年叙功晉一等男後以年老乞休尋卒子長清改襲一等輕車都尉





欽定八旗通志卷一百三十六

欽定四庫全書

欽定八旗通志卷一百三十七

人物志十七

大臣傳三

滿洲鑲黃旗三  
喀木卓布泰

辰泰  
鰲拜

布克沙  
遏必隆

喀巴

哈尼滿路什沃赫

辰泰

辰泰滿洲鑲黃旗人姓鈕祜祿額亦都孫也父曰車爾格辰泰初以護軍叅領從攻明錦州遇寧遠

援兵先衆直入斬執纛者獲其纛馬天聰三年從  
太宗文皇帝征明北京駐軍德勝門外分兵攻巡撫袁崇  
煥營遇伏奮擊有斬獲五年大軍圍大凌河城明  
監軍道張春率衆赴援辰泰設伏擒其偵卒復以  
步戰殲敵衆崇德元年從征朝鮮與副都統薩木  
什喀乘夜襲破黃州守將營三年隨睿親王多爾  
袞率師征明敗明兵於豐潤縣攻內監馮永盛總  
兵侯世祿營皆拔之又以護軍三十敗總兵祖大

壽騎卒百餘俘獲紀功五年隨証明錦州有降明  
蒙古蘓班代來歸辰泰率之進攻杏山敗敵兵獲  
牲畜六年圍錦州敗松山兵我樵採者為敵兵所  
困辰泰率兵六人援之出又敗敵兵之來襲我後  
隊者連戰皆捷遂克其郭是年由騎都尉世職晉  
三等輕車都尉七年從圍錦州掘濠困松山明兵  
夜犯正黃旗蒙古營辰泰往援擊敗之八年隨貝  
勒阿巴泰等証明敗總兵馬科於渾河築梁以濟

明總兵范志完以兵來拒復擊走之至山東攻克東阿汶上寧陽三城晉二等輕車都尉順治元年從入山海關破走流賊李自成明年

世祖章皇帝詔叙勲臣晉一等輕車都尉四年授禮部侍郎從征湖廣敗流賊一隻虎於荊州尋奉

命為靖南將軍同副都統棟阿賴征福建至則擊賊渠曹大鎬敗之又於建寧敗賊張耀星步兵四千克同安平和二城五年破海逆鄭彩兵彩遁入海復長

樂連江二縣擒偽總督顧世臣等十一人於興化  
斬之以次克復郡縣全閩底定奉

旨嘉獎六年授護軍統領七年論功晉二等男擢刑部尚  
書八年二月遷吏部尚書三月授國史院大學士  
七月以加上

皇太后尊號誤增

恩詔赦款奉

上詢問以有例對下廷議坐巧飾誑奏罷任降世職為一

等輕車都尉九年正月起為禮部尚書二月充會試主考官三月授鑲黃旗都統先是兩遇

恩詔晉三等子兼一雲騎尉旋以吏部奉

覃恩陞襲過濫

命改為一等輕車都尉兼一雲騎尉至是奉

特旨晉二等子十年授寧南靖寇大將軍征湖廣十一年

改吏部尚書兼都統仍任大將軍十二年孫可望

劉文秀盧明臣馮雙禮等帥衆六萬樓櫓千餘分



犯岳州武昌而文秀以精兵攻常德辰泰遣護軍  
統領蘓克薩哈設伏以待叅領呼尼牙羅和先與  
之遇擊敗其衆復令叅領蘓拜希福等並以舟師  
迎擊八旗繼進三戰三捷敵復列艦拒戰發伏兵  
擊之焚其船別遣兵破其餘衆於德山下師抵龍  
陽縣敵又集兵二千來犯我兵勦之皆潰奔明臣  
赴水死獲禮被創遁文秀走貴州降其副將等四  
十餘員兵三千餘叙功晉世襲一等子兼一雲騎

尉未幾以疾卒於軍明年正月

世祖召凱旋諸臣勞之以酒

諭曰大將軍辰泰南征効力卒於戎行朕甚傷悼因揮淚  
不已復

諭學士麻勒吉等曰若大將軍班師生入國門朕將親酌  
宴勞不意中道棄捐不復相見爾等以此一觴奠大將  
軍靈次少抒朕追悼之懷諸臣及左右侍從無不感涕  
賜祭葬如典禮謚忠襄以其子尼滿襲爵旋卒無嗣以弟

喇哈達之子白啟為後襲焉

布克沙

子貴復

布克沙滿洲鑲黃旗人姓瓜勒佳天聰時以護軍校駐防牛莊出偵敵擊敗明兵崇德二年從征明皮島同叅領鰲拜乘舟先登島岸取之得

優賚旋授護軍叅領五年大軍圍錦州刈其田禾明兵拒戰布克沙率護軍十人擊卻敵衆復擊敗杏山松山步騎兵又同都統圖爾格等設伏敗敵追擊至

河濱寨敵纛并獲其馬叙功予雲騎尉世職六年  
復圍錦州明總督洪承疇自松山遣騎來犯戰卻  
之復破其三營步兵七年隨貝勒阿巴泰征明擊  
敗明總兵馬科於渾河岸其別將率三千餘人拒  
守渡口又擊敗之遂趨山東畧萊州攻克蒙陰沂  
水二城八年五月凱旋

賚銀幣晉世爵為騎都尉順治二年隨英親王阿濟格征  
流賊李自成於陝西由綏德進延安屢敗賊衆自

成走湖廣復躡擊之敗賊衆於安陸武昌又同都  
統都類追至九江口獲賊船會奉

詔班師過池州擊走明總兵黃蜚部衆獲其船十有三  
年隨豫親王多鐸征蘓尼特部騰機斯偵知布爾  
噶圖山有賊隨貝勒博和託追斬二十餘人又擊  
敗土謝圖汗及碩洛汗兵八年二月擢鑲黃旗蒙  
古副都統九月兼任戶部侍郎九年四月以有疾  
解侍郎任八月並罷副都統先是叙平流賊暨征

騰機斯功由騎都尉加一雲騎尉及三遇

恩詔洊晉一等輕車都尉十四年卒長子哈楚罕襲第三

子貴復任侍衛兼佐領順治十六年大軍既定雲  
南沅江土司那嵩復叛貴復隨都統卓洛討平之  
康熙十四年隨安親王岳樂討逆藩耿精忠至江  
西敗賊于符潭浦賊將李茂珠等率萬餘人相拒  
于建昌府城南鐘鼓山貴復力戰被創尋以創發  
卒予雲騎尉世職以其子璫色襲

喀喀木

喀喀木滿洲鑲黃旗人姓薩哈爾察先世居烏喇  
部父塘阿禮當

太祖高皇帝時率百人來歸授佐領使轄之從征遼東有  
功予三等輕車都尉世職後從征瓦爾喀為熊傷  
而卒喀喀木襲職

太宗文皇帝崇德三年授吏部理事官五年隨承政索海  
征呼爾哈部敵據柵拒戰喀喀木率衆攻破其柵

擊斬二百人生擒索倫兵一百三十以歸七年隨  
征明松山以本旗將領失律未察舉降世職為騎  
都尉八年二月擢吏部叅政

世祖章皇帝順治元年署副都統隨大軍入山海關督後  
隊兵擊敗流賊李自成叙功加一雲騎尉時改叅  
政曰侍郎喀喀木仍任吏部四年考滿復三等輕  
車都尉世職尋奉

命率兵征鄖陽先是大兵定湖廣明鄖陽總兵王光恩迎



降即與原官留鎮至是以罪逮繫其弟王光泰遂  
叛糾衆據鄖陽自稱明鎮武伯聯結叛賊賀珍武  
大定等為應援提督孫定遼戰歿賊勢猖獗喀喀  
木自河南進征將薄鄖陽光泰乃遁喀喀木偕副  
將王平率兵渡河追勦至房縣斬級千餘光泰及  
偽總兵李世英等竄四川喀喀木還駐鄖陽五年  
春總督羅繡錦以叛鎮金聲桓自江西窺湖廣請  
留喀喀木駐防荊州六年還京七年兼任鑲黃旗

副都統三遇

恩詔晉爵三等男初鄂爾多斯部扎穆素多爾濟屯牧神  
木邊外害我使臣叛逃既而扎穆素悔罪來歸多  
爾濟竄匿賀蘭山屢犯邊界肆劫掠八年九月喀  
喀木奉

命同都統噶達渾等率兵討之九年正月自寧夏出水驛  
口至賀蘭山後分兵搜勦斬多爾濟及其弟二人  
並部衆悉殲之俘幼弱及婦女以歸獲馬駝各數

百牛千餘羊萬餘是年五月授鎮守江寧總管十年

命為靖南將軍勦廣東賊寇時李定國自廣西掠廣東潮州總兵郝尚久應之踞城以叛喀喀木至廣州同靖南王耿繼茂進征潮州攻圍逾月以雲梯兵克城尚久投井死潮州及附近州縣悉平仍還駐江寧十六年六月海賊鄭成功陷鎮江襲踞瓜洲遂犯江寧喀喀木與總督郎廷佐提督管效忠協謀

禦擊檄調蘓松總兵梁化鳳等赴援會貴州凱旋之副都統噶褚哈瑪爾賽率兵由長江東下亦使人邀之駐守喀喀木與密議曰賊勢盛宜乘其未集先擊之乃簡兵逆擊賊衆之先至者賊敗卻獲舟二十餘七月成功悉衆薄城連營八十有三賊艘蔽江喀喀木與文武官晝夜防守俟援兵既集議以綠旗兵先擊賊營於儀鳳鍾阜門外梁化鳳出儀鳳管效忠出鍾阜夾攻截擊殲賊甚衆陣擒

偽總統余新及偽總兵二賊氣奪次日喀喀木同  
噶褚哈瑪爾賽率兵出神策門見賊據山列陣乃  
先分兵左右仰攻而自率精銳擣其中堅陣擒偽  
提督甘輝及偽總兵數人斬馘無算成功收潰衆  
乘船遁我水師復截擊之淹斃過半焚其船五百  
餘又分水陸追剿賊之在鎮江瓜洲者皆遁捷  
聞下部優叙尋兵部請議前此失陷鎮江瓜洲罪  
上念其固守江寧功可抵罪予免議

聖祖仁皇帝康熙元年改江寧總管為將軍仍以喀喀木  
任之七年八月卒以其子喇揚阿襲一等輕車都  
尉兼一雲騎尉

卓布泰

卓布泰滿洲鑲黃旗人姓瓜勒佳偉齊次子也

太宗文皇帝時任佐領崇德四年隨承政薩木什喀索海  
征呼爾哈部有鐸陳阿薩津二城以兵四百逆戰  
卓布泰與佐領薩弼圖率甲士九十人擊敗之斬

級五十敵復與索倫部長博穆博果爾合兵來拒  
卓布泰率先邀擊挫敵獲丁壯六十有奇叙功授  
雲騎尉世職五年任叅領隨大軍征明錦州於松  
山杏山間連敗敵兵六年鄭親王濟爾哈朗復圍  
錦州明總督洪承疇以重兵列營山口拒守卓布  
泰同副都統翁阿岱迎戰明兵敗遁大軍合左右  
翼擊敵于松山復與翁阿岱率兵破之還軍敵躡  
襲我後翁阿岱中創仆卓布泰力戰殺賊掖翁阿

岱乘馬以歸七年十月隨貝勒阿巴泰征明至青  
州屢敗敵軍明總兵張登科和應薦等合八鎮兵  
來拒卓布泰率師奮擊大敗之又乘夜襲破其餘  
衆八年五月凱旋

賚白金兼任兵部理事官

世祖章皇帝順治元年同叅領沙爾瑚達征黑龍江攻克  
圖瑚勒禪城獲丁壯二百餘是年冬隨豫親王多  
鐸追剿流賊李自成師次潼關同都督恩格圖等



連敗賊衆二年進克西安自成遁湖廣卓布泰與  
護軍統領敦拜阿爾津等追擊殲賊騎三百移師  
下江南隨端重親王博洛征浙江敗敵衆於杭州  
松江海寧平湖諸郡邑斬級數百獲戰艦百餘三  
年復隨端重親王征福建署副都統師次延平明  
唐王朱聿鍵走汀州大軍追勦之卓布泰別率兵  
直趨福州攻克其城是年叙功晉世職騎都尉兼  
一雲騎尉明年考滿晉三等輕車都尉五年隨鄭

親王濟爾哈朗征湖南時衡州寶慶諸郡為明桂王朱由榔之將所踞六年四月卓布泰復署副都統同都統佟圖賴等自湘潭進征連破敵寨斬其總兵陶養用遂復衡州桂王將胡一青以步騎萬餘踞城南山岡列七營卓布泰與佟圖賴合攻之皆潰走又擊敗其總兵王進才方世勇周進唐等於道州靖州七年凱旋得

優賚八年擢刑部侍郎九年改授鑲黃旗副都統尋遷護

軍統領列議政大臣叙湖南功並先後遇

恩詔晉爵至二等男世襲罔替十一年擢內大臣十三年  
任鑲黃旗都統十四年

命為征南將軍率兵至廣西與湖南四川兩路大兵會期  
規取黔滇時朱由榔竄雲南其將李定國白文選  
李成爵等分據黔西要隘十五年九月卓布泰次  
獨山州與信郡王多尼等約師期遂率兵由都勻  
進盤江賊聞大兵至悉沉船潛伏山谷卓布泰用

土司岑繼魯言從下流十里取所沉船中夜濟師  
李成爵以衆萬餘屯據涼水井大破之進攻雙河  
口山寨李定國列象陣拒戰擊之俱潰定國又悉  
衆為三十營列柵固守卓布泰分軍三隊張左右  
翼進擊再戰皆捷追斬四十餘里獲其象馬嗣聞  
賊衆尚堅守鐵索橋乃從晉安間道進羅平州會  
信郡王等軍攻克雲南城由榔奔永昌十六年二  
月同貝勒尚善等進鎮南州破白文選於玉龍關

渡瀾滄江取永昌由榔奔騰越復進勦之渡潞江  
定國以兵六千伏磨盤山卓布泰分兵八隊以鎗  
礮發其伏掩擊之斬殺過半遂取騰越州由榔奔  
緬甸卓布泰乘勝追逐越南甸至孟村而還捷

聞

賚蟒服鞍馬明年二月還京

命內大臣迎勞之仍任都統兼佐領尋追論在軍營時鞠  
勦將士功罪不實應革爵罷任議政王貝勒等召

卓布泰告之卓布泰厲聲爭辯王貝勒等劾其出  
言怨望請處絞籍沒

上命從寬革爵罷任

聖祖仁皇帝康熙三年復原爵八年以弟鰲拜獲罪連坐  
革爵十六年

聖祖念其征雲南有功仍復二等男世爵十七年卒  
賜祭塋如典禮謚武襄子增壽襲爵

鰲拜

鰲拜滿洲鑲黃旗人姓瓜勒佳衛齊第三子也初以護軍校從征屢立戰功天聰八年授騎都尉世職任叅領從

太宗文皇帝征察哈爾收其散亡部衆旋奉

命與護軍統領譚泰等由上方堡入明邊設伏以越界出畧又不至期會地

詔奪其所俘獲崇德二年隨征明皮島武英郡王阿濟格集諸將問進取之策鰲拜與叅領準塔願為前驅

與王約曰不得此島勿復見王遂與準塔連舟渡  
海敵嚴陣拒堡上我兵莫能登鰲拜大呼超躍而  
上冒矢石直前搏戰準塔繼之明軍披靡遂克其  
島

太宗以此島可比大城

命優叙晉三等男

賜巴圖魯號四年率護軍略地錦州有斬獲六年隨鄭親  
王濟爾哈朗圍錦州以步戰敗明步軍營功最得



優賚晉爵一等方大兵之圍錦州也明援兵踵至城內兵復乘間衝突夾擊我軍鰲拜往來接戰每不待軍令輒當先陷陣五戰皆捷時明總督洪承疇等率兵十三萬赴援

太宗親統大兵環松山而營敵兵出犯屢擊却之還營度明師必宵遁

命鰲拜移駐右翼汎地協力追勦夜一鼓明兵果遁鰲拜與護軍統領阿濟格尼堪等相繼躡擊擒斬過半

七年擢護軍統領八年隨貝勒阿巴泰等征明攻  
邊城指揮本旗兵先登克之長驅入邊敗明守將  
進薄燕京畧地至山東三敗明兵斬殺甚衆攻充  
州府及臨清汶上諸邑並麾軍前進有功別遣將  
士畧取四城凱還師次密雲擊走敵兵三千復破  
明總兵吳三桂總督范志完諸軍是歲十月叙功  
晉三等子

賚金幣甚厚順治元年隨大兵定燕京二年

世祖章皇帝命考核羣臣功績鰲拜以忠勤戮力晉一等  
子隨英親王阿濟格征湖廣至安陸破流賊李自成  
兵睿親王多爾袞以英親王有罪令鰲拜與都  
統譚泰於軍中集衆暴其狀鰲拜譚泰匿之以  
示衆論罪罰鍰明年隨肅親王豪格征四川敗叛  
將賀珍兵於楚湖師抵西充賊渠張獻忠列營拒  
戰鰲拜奮擊大破之斬獻忠於陣賊衆收合餘燼  
復犯我師鰲拜遣軍士連擊敗之旋偕侍衛李國

翰等分勦賊黨俘斬無算下遵義夔州茂州諸郡  
邑五年二月部臣論隨征叅領希爾根冒功爭賞  
罪鰲拜坐軍中詳勘不實論革世職又以貝子屯  
齊等訐告鰲拜於崇德八年與護軍統領圖賴等  
六人謀立肅親王私結盟誓廷議應死並得

旨罰贖四月侍衛科普索訐告鰲拜擅撥護軍為侍衛遇  
必隆守門仍論死

上復宥之十一月統兵駐防大同時總兵姜瓖叛鰲拜率

七騎敗賊兵三百餘明年端重親王博洛率師至  
與鰲拜合攻大同鰲拜遣部將敗賊兵之奪我礮  
者賊將楊振威率兵萬餘犯正藍旗營鰲拜以右  
翼三旗兵大破其衆賊兵五千餘由大同北山至  
立兩營逼我軍鰲拜率精銳進勦破其一營乘勝  
逐北環聞北山援兵至亦盡發城中出拒我師鰲  
拜縱擊斬獲殆盡賊將復以兵截戰敗之於忻口  
再敗之於晉祠鎮攻汾州關克孝義縣皆以捷

聞七年睿親王有疾貝子錫翰等請

駕臨幸王以錫翰違令瀆請鰲拜目擊其非不即執訊降

爵為一等男并罰贖

世祖親政晉三等侯八年任議政大臣叙功晉一等侯兼

一雲騎尉九年自陳勞績且以忤睿親王意致屈

抑戰功訟於

上詔部議晉二等公

賜勅予世襲免死二次尋授領侍衛內大臣十三年奏請

三年一次舉行

大閱以講武事傳令大臣侍衛等

御前較射著為令是年十二月創發卧疾

上親臨視明年以

恩詔加少保兼太子太保尋加少傅兼太子太傅教習武

進士十八年受

顧命奉

聖祖仁皇帝嗣統與內大臣索尼蘇克薩哈過必隆為輔

政大臣既受事與內大臣飛揚古有隙又飛揚古  
子侍衛倭赫及侍衛西住折克圖覺羅塞爾弼同  
直

御前不加禮輔臣鰲拜惡之遂論倭赫等擅乘

御馬及取

御用弓矢射鹿罪並棄市坐飛揚古怨望亦棄市并殺其  
子尼侃薩哈連籍其家以與弟都統穆里瑪先是  
鑲黃旗屯莊畫給保定河間涿州之地已二十年



蘇克薩哈鰲拜姻婭也論事多齟齬積而成讐鰲拜因蘓克薩哈籍隸正白旗欲以薊州遵化遷安諸莊改撥鑲黃旗而別圈民地給正白旗康熙五年使旗人訴請以牒部大學士蘓納海管戶部議阻之貝子溫齊等以履勘鑲黃旗地不堪耕種疏聞遣蘓納海與直隸總督朱昌祚巡撫王登聯丈量酌易時則兩旗人較量肥瘠相持久不決而旗地待換民地待圈所在荒廢不耕百姓環訴失業昌祚等

交疏請停止圈換之令鰲拜怒坐蘇納海撥地遲  
悞昌祚等紛更妄奏悉逮治棄市且以蘓納海族  
人已故額駙英俄爾岱為睿親王私黨令部臣盡  
削世襲以洩其忿明年議蘓克薩哈罪慮大學士  
巴泰逆已意不使與聞坐蘓克薩哈以大臣缺望  
蓄異志論應磔

上鑒其枉鰲拜攘臂強爭卒予絞并誅其族屬鰲拜之受  
顧命也名列過必隆後至是索尼死矣班行章奏鰲拜皆

前列日與弟穆里瑪侄侍衛塞本特訥莫大學士  
公班布爾善尚書阿思哈噶褚哈馬爾賽都統濟  
世侍郎泰璧圖學士吳格塞等黨比營私是時侍  
讀熊賜履遵

旨條奏時政有曰內臣者外臣之表也又曰急功喜事但  
知趨目前尺寸之利以便其私圖鰲拜聞而惡之  
曰是劾我也入

對時輒請

申禁言官不得上書陳奏

聖祖既躬親大政冀其感

恩悔罪克保功名

特命鰲拜於二等公外加

賜一等公以其子那摩佛襲二等公爵七年

世祖配

天章恩加鰲拜太師加那摩佛太子少師時有竊其馬者

鰲拜捕斬之併殺

御馬羣牧長怒蒙古都統俄訥喇哈達宜理布于議政時  
不附已即令蒙古都統不與會議馬爾賽故部臣

請謚

上不允鰲拜令仍給與謚八年五月

上以鰲拜結黨專擅勿思悔改

命議政王等逮治鰲拜罪

諭曰前工部尚書員缺鰲拜以朕素不知之濟世妄稱才能  
能推補通同結黨以欺朕躬又奏稱戶部尚書應授二

員將馬爾賽徇情補用又鰲拜於朕前辦事不求當理稍有拂意即將部臣叱喝引見時在朕前施威震衆科道官條奏鰲拜屢請禁止恐身干物議閉塞言路凡用人行政欺朕專權恣意妄為文武各官欲盡出伊門下與穆里瑪等結成同黨凡事在家定議然後施行且倚仗兇惡棄毀國典與伊相合者薦拔之不合者陷害之朕念鰲拜舊臣望其改惡悔過今乃貪聚賄賂奸黨日甚上違

君父重托下則殘害生民種種惡跡難以枚舉其嚴拏勘  
審于是康親王傑書等列其攬權欺罔諸罪狀請革職  
立斬籍沒那摩佛亦論死

上親加鞠訊情罪俱實

諭曰鰲拜以勲舊大臣受恩

皇考遺詔輔佐政務理宜精白乃心盡忠圖報不意結黨  
專權紊亂國政紛更成憲罔上行私朕久已悉知尚望  
其改行從善克保功名以全終始乃近觀其罪惡日多

命諸王大臣公同究審俱已得實以所犯重大擬以正法本當依擬處分但念鰲拜在累朝効力年久且

皇考曾經倚任朕不忍加誅姑從寬革職籍沒仍行拘禁那摩佛亦免死革職拘禁鰲拜死乃出那摩佛于獄而釋之卒於家五十二年

上復念鰲拜戰陣功多

特追賜一等男以其弟巴哈之孫蘓赫襲蘓赫卒仍以鰲拜孫達福襲



世宗憲皇帝時

賜鰲拜祭葬復一等公世襲罔替加封號曰超武

遏必隆

遏必隆滿洲鑲黃旗人姓鈕祜祿額亦都第十六子也母和碩公主天聰八年

太宗文皇帝賜勅命遏必隆襲其父一等子爵任侍衛九年

詔免功臣徭役遏必隆與烏並給人戶使管佐領事貝勒

尼堪福晉過必隆兄都統圖爾格之女也無子詐取僕婦女為己生尼堪入奏

命刑部承政索海等會鞫之過必隆告於鄭親王濟爾哈朗曰索海與尼堪為姻戚恐左袒宜勿與訊及會勘福晉謀詐事實過必隆坐徇庇欺誑削爵崇德六年從

上征明移營松山浚濠環守明總兵曹變蛟率乳峰山步騎欲棄寨突圍出屢犯兩黃旗營過必隆連擊敗

之夜三鼓變蛟集敗兵突犯

御營過必隆與侍衛坤巴圖魯巴什塔及大臣錫翰等堅  
守後營門壘力戰殪十餘人變蛟負創以其衆遁  
走

詔守衛不嚴諸臣輸罰鍰分賚禦敵將士過必隆得

優賞七年隨饒餘貝勒阿巴泰等征明入長城克薊州進

兵山東抵兗州攻夏津先登克其城授騎都尉世  
職順治二年流賊李自成遺孽李錦與賊黨郝搖

旂等竄聚湖廣為亂荆襄武漢道路多梗遏必隆  
隨順承郡王勒克德渾往討之師次武昌賊據守  
要隘遏必隆先衆攻擊大軍繼進斬殺無算遂拔  
鐵門關叙功晉二等輕車都尉五年兄子侍衛科  
普索訐其與白旗諸王有隙設兵護門事論死籍  
沒得

旨免死革世職及佐領籍家產之半八年

世祖章皇帝既親政遏必隆訟削職寃

詔復職明年科普索獲罪以所襲圖爾格之二等公爵令  
過必隆併襲為一等公有護軍擺思哈喇者當

太宗上賓時托疾不守門至是已授騎都尉又一雲騎尉  
過必隆舉劾其前罪下部鞠實置之法籍其家以  
與過必隆旋任議政大臣三月掌鑾儀衛事十月  
擢領侍衛內大臣十四年加少保兼太子太保尋  
加少傅兼太子太傅十八年受

遺詔與索尼蘇克薩哈鰲拜同為輔政大臣康熙六年三

月御史張惟赤疏請

聖祖仁皇帝親政於是索尼等以歸政請遏必隆亦懇請

再三是歲七月

上躬親大政

諭部加恩輔臣以示酬庸之典

詔從部議

加賜遏必隆一等公爵復以其長子法喀襲原授之一等

公遏必隆奏辭不允

賜戴雙眼孔雀翎明年加太師尋乞罷輔政

溫諭慰留又明年再請乃許先是輔政時索尼老病鰲拜多專政與蘓克薩哈不相能過必隆不能自異及鰲拜倡圖易旗地之令中外大臣皆謂為不便過必隆欲停止窺鰲拜意在必行遂弗與爭既而鰲拜矯

旨誅大學士蘓納海等復族誅蘓克薩哈過必隆皆不為阻亦不入奏八年鰲拜獲罪

上以過必隆同列輔政明知其惡而緘口不語

詔法司併逮問論死

上復念其結黨無實宥之削太師銜及後

賜之一等公九年

諭兵部曰前以輔政大臣過必隆知鰲拜樹黨亂政不豫  
行糾劾故坐之罪今念其為

皇考顧命大臣且勲臣子其咎止於因循瞻顧未嘗躬負  
重愆特為寬宥仍以公爵宿衛內廷過必隆遂以一等



公品級入

朝侍直十二年十二月疾篤

上臨視慰問及卒

賜祭塋謚恪僖勒石墓道碑文稱其賦性敬慎制行端方  
愍誠報國著有勤勞云尋以

冊立

孝昭仁皇后推

恩所生

特旨令立家廟

賜御製碑文復

御書策名金石四字以額其祠五十一年

上念過必隆曾襲其父世爵緣事削除未襲

特命以其第四子音德襲一等子世爵子五人音德別有

傳

巴哈

巴哈滿洲鑲黃旗人姓瓜勒佳衛齊第四子也初

任一等侍衛

太宗文皇帝崇德二年設議政大臣二十有四已哈與焉

七年從征明錦州凱旋

上幸牧馬所

命內大臣侍衛與新降之明總兵祖大壽等校射獎賞有

差巴哈得

賜駝一

世祖章皇帝順治元年隨大軍入山海關定燕京二年以

巴哈在

太宗朝扈從著勞授騎都尉世職時睿親王多爾袞攝政  
都統譚泰許內大臣索尼詆誹睿親王及捕魚牧  
馬鼓琴演戲諸款法司鞠訊以巴哈曾與索尼同  
觀偶戲議革世職罷任

詔貫之三年隨肅親王豪格征陝西四川尋以考滿並叙  
隨征功晉世職至一等輕車都尉六年睿親王帥師  
討大同叛鎮姜瓖巴哈請從征自効王弗許復

再三請王使人諭以或隨明甲隊或隨暗甲隊惟所自便巴哈知王終弗用也拂衣起遽歸翼日議罪應斬改罰贖七年睿親王有疾貝子錫翰等奏請

上駕臨視睿親王罪以擅請並責巴哈弗執問復罰鍰八年

上親政

命為議政大臣三遇

恩詔晉爵至一等男初肅親王為睿親王構陷卒於獄子富綬尚幼尚書宗室鞏阿岱議殺之巴哈同內大臣哈什屯持不可乃止鞏阿岱因與其弟錫翰及侍衛冷僧機勸睿親王疎遠巴哈及其兄鰲拜既而錫翰復以巴哈入直

御前太數及內大臣西訥布庫等議其罪聞有

旨嘉巴哈勤勞議乃寢至是

上以鞏阿岱錫翰冷僧機西訥布庫朋比妄行

命諸王大臣鞠訊巴哈證其狀咸伏誅十二年以巴哈恪供職業加少保兼太子太保十四年晉少傅兼太子太傅十五年授領侍衛內太臣

聖祖仁皇帝康熙六年以其子訥爾都尚公主封和碩額駙八年

上以察哈爾阿布奈久缺朝請無藩臣禮

命巴哈往察其狀及還會鰲拜以結黨擅權獲罪同父兄弟並褫革論斬籍沒

上念巴哈宣力年久貸其罪並免籍沒後以疾卒子九人  
次子蘇爾達別有傳

尼滿

尼滿滿洲鑲黃旗人姓富察崇德六年考授筆帖  
式順治二年授編修八年晉內秘書院侍讀十年  
遷侍讀學士十三年考滿

恩廕一子入監讀書尋擢內宏文院學士十五年遷

保和殿學士兼禮部左侍郎十七年六月晉刑部右



侍郎給事中孫光祀成肇毅及鎮海將軍劉之源  
江南總督郎廷佐疏劾蘇松提督馬逢知陰附海  
賊鄭成功

命廷臣會鞠僉以逢知交通海逆罪重擬并其子駢誅  
上以逢知叛逆未得實情

命尼滿往江南同之源廷佐確審尋以賊犯江寧逢知託  
言招撫陰相比附不誅賊黨交通書信入奏逢知  
抵罪如律康熙二年授本部尚書五年遷都察院

左都御史六年四月疏言流徙寧古塔尚陽堡各犯許認修城樓及部院衙門贖罪該犯家產籍沒工費數萬何自而得一經奉

旨回籍視稍贍之家挾詐逼勒致良民受害請嗣後認工贖罪者概停從之八年七月疏言民所賴以生者惟農與商大臣不宜與小民爭利今在外藩王等不能仰體

皇上愛民至意凡商貨輳集多獲利益之所占據貿易縱

屬放債牟利州縣官莫敢誰何此輩遂肆行無忌  
逼民變產償債甚至釀命案請

敕禁藩王等商人除本城貿易外如仍貿易各處地方官  
不即查拏被人舉首者以徇庇論本主以縱屬治  
罪貨物債銀入官又疏言百姓固苦於不肖官員  
朘削更苦於差役繁劇如差遣官員船隻夫馬一  
切供應雖額設錢糧而貪官汙吏藉端徵派侵漁  
請嗣後除軍國大事仍由內差其他責成各督撫

如隱匿徇庇重治其罪俱下部議行是年九月甄別部院堂官議以尼滿歷任年久辦事雖勤重大事未見指叅應降二級留任得

旨尼滿著以原品隨旗行走未幾卒

路什

子布納海

路什姓納喇世居章嘉城父克恩

太祖高皇帝時來歸隸滿洲鑲黃旗

太宗文皇帝崇德七年路什隨貝勒阿巴泰征明至山東

宛州府我軍以雲梯攻城路什先登克之

賜號巴圖魯授三等輕車都尉世職

世祖章皇帝順治元年睿親王多爾袞統大兵入山海關  
路什任叅領與佐領袞泰以步兵擊敗流賊李自成  
復同副都統阿哈尼堪追至望都縣敗之二年  
隨英親王阿濟格赴陝西征勦李自成斷其歸路  
與副都統阿喇善敗賊於綏德州遂圍延安府自  
成兄子錦踞城抗拒路什隨大軍七戰皆捷錦遁

去自成為豫親王多鐸所敗棄西安南走商州遁  
入湖南英親王統大兵躡其後至武昌自成賊巢  
在馬偽侯劉宗敏等率衆拒戰路什同前鋒統領  
蘓拜擊敗其衆并俘獲自成妻孥是年叙入關敗  
流賊功晉二等輕車都尉明年肅親王豪格奉

命西征路什率兵隨時叛將賀珍犯陝西漢中以賊兵二  
千踞守雞頭關路什同護軍統領鰲拜力戰克之  
追破珍于楚湖遂入四川與護軍統領希爾根擊

敗流賊張獻忠及獻忠滅路什分兵勦餘賊俘斬  
甚衆七年九年兩遇

恩詔晉爵三等男十五年隨信郡王多尼征貴州明桂王  
朱由榔使其將羅大順拒戰於黔西州十萬溪箐  
路什同前鋒統領鄂訥副都統噶褚哈分兵三隊  
奮擊連敗賊衆十七年叙功並錄前此陝西湖廣  
四川戰績晉爵二等男世襲罔替

聖祖仁皇帝康熙十七年貝勒尚善等進師湖南勦逆藩

吳三桂路什率所部兵扼岳陽湖之九馬嘴值賊舟卒來犯路什奮戰力竭沒於陣事

聞予卹晉一等男兼一雲騎尉子布納海襲三十六年

上親征厄魯特噶爾丹布納海隨領侍衛內大臣伯費揚

古由西路進兵敗賊于昭莫多師旋叙功晉爵三

等子四十六年以年老乞休子瑚什屯改襲二等

男

沃赫



沃赫滿洲鑲黃旗人費英東之孫也崇德八年襲父察喀尼三等子爵順治七年九年兩遇

恩詔洊晉一等子十五年授散秩大臣十六年

世祖章皇帝追念費英東為開創功臣予三等公世襲罔替旋擢內大臣康熙八年內大臣鰲拜獲罪拘禁沃赫因與同族部議革官職

聖祖仁皇帝命留三等公爵在驍騎營行走十三年六月逆藩吳三桂耿精忠遣賊黨分路寇掠江西沃赫

同三等子穆成額俱奉

命署副都統領宛州駐防兵赴定南將軍希爾根軍協力  
防勦十月沃赫同副都統幹都海總兵官趙應奎  
等破耿逆偽總兵左宗邦之兵於分宜擒斬甚衆  
十一月吳逆偽將軍朱君聘偽總兵黃乃忠合兵  
數萬自萍鄉來犯袁州沃赫同幹都海穆成額趙  
應奎等擊敗之西村又登山斬賊五千餘級時賊  
黨踞安福沃赫防守分宜議令穆成額分兵先往

而遣護軍一半繼之大破賊衆用雲梯攻城復安  
福縣十四年四月勦賊驚石嶺白水口等處擒斬  
無算十五年正月遇

恩詔加太子太保二月隨大將軍安親王岳樂進征萍鄉  
破賊十二寨偽將軍夏國相等敗遁遂復萍鄉縣  
三月隨安親王至長沙吳逆賊黨五千餘人迎戰  
沃赫同副都統阿進泰擊卻之十六年安親王令  
沃赫率兵赴茶陵駐守十七年將軍穆占疏言茶

陵攸縣等處與賊逼近且吳三桂盤踞衡州江之東岸有偽將軍馬寶等立營獨令沃赫駐守兵力

單弱

上因命趙應奎率標兵赴茶陵又

諭簡親王喇布分兵付定南將軍華善率赴茶陵與沃赫協力鎮守既簡親王由江西進湖南駐師茶陵沃赫分守攸縣十八年湖南既平沃赫隨大將軍貝子彰泰進征雲貴十九年十二月授鑲黃旗蒙古

副都統旋調滿洲副都統二十年十月雲南平凱  
旋二十一年六月擢鑲黃旗蒙古都統二十二年  
三月議政大臣等追論沃赫於十六年三月在長  
沙擊賊時既抵鹿角挨牌仍退回罪應革職籍家  
產其江西勦賊復城屢奉

旨優叙又隨大軍平定雲南功罪相抵請革去世爵免其  
籍沒

上曰沃赫為人尚優所襲公爵原係其祖之職即革去亦

應子弟承襲著從寬留其都統公爵革去太子太保二十三年遷領侍衛內大臣二十八年仍改授鑲黃旗蒙古都統三十年六月卒年五十有二

賜祭葬如例子傳爾丹襲爵官至都統將軍別有傳

欽定八旗通志卷一百三十七